

LA  
FORTIFICATION  
DEMONSTREE ET  
REDVICTE EN ART  
PAR FEV

HERRARD DE BAR LE DVC  
Ingenieur du Treschrestien Roy de france et de  
Navarre

Reveue corrige'e & augmentee par M<sup>r</sup> Errard  
son nepveu aussi Ingenieur ordinaire du Roy  
suivant les memoires de L'Inieur Contre les  
groses Forceurs de l'Impression contrefaite  
en Allemagne Dediee a sa Majeste



Mus-  
-C-  
Tab-  
-40<sup>a</sup>  
n<sup>o</sup> 28<sup>e</sup>



Paris 1620  
Et avec Privilege du Roy





# AV ROY.



SIRE,



Chacun sçait comme le feu Sieur Errard, mon Oncle, a esté le premier d'entre tous vos subjects, qui a reduict en Art la perfection des Fortifications. Son Livre qu'il mit en lumiere, avec ses Figures & embellissemens, par le commandement du feu Roy, vostre Pere, HENRY LE GRAND, d'immortelle memoire, en rend assez de tesmoignages. Mais comme la perfection ne gist pas au commencement, ledit Sieur Errard se mit à reueoir & examiner curieusement & exactement ledit Livre, afin de le rendre de plus facile intelligence; Il luy eust donné la dernière main, si la mort ne l'eust preuenue: Le desir qu'il auoit de seruir à V. M. & au public, le conuia (quelques heures auparauant son trespas) à me commander d'effectuer son intention; A quoy j'ay tasché de satisfaire, au mieux qu'il m'a esté possible; ayant mis tout mon soing, & toute ma diligence, pour donner les viues couleurs necessaires à cét ouurage, lequel se presente maintenant à V. M. suivant le premier dessein de son principal Auteheur. Receuez-lé, donc, SIRE, avec la mesme Clemence & Douceur que vous auez accoustumé d'accepter les choses qui ne regardent que le bien de vostre seruiue, l'utilité de la Noblesse Françoisse, & de vos autres subjects; & ie continueray à prier DIEU pour la prosperité & santé de V. M. de laquelle ie demeureray eternellement,



Tres-humble, tres-obeissant, & tres-fidel  
subiect & seruiteur, A. ERRARD.



ADVERTISSEMENT AV LECTEUR.  
 SUR LE SYBIECT DE LA REIMPRESSION DE CE  
 LIVRE, ET TOUCHANT CE QUI A ESTE' DE  
 nouveau adjousté en iceluy.

**A**MY LECTEUR, l'ay bien voulu vous aduertir, que le feu sieur ERRARD, mon Oncle, a esté le premier, & le seul Auhcur de ce Livre; & que comme il vouloit mettre la dernière main, pour donner une entière perfection à cét ouvrage, il auroit esté prevenu de la mort: Quelques heures auparavant il me laissa héritier de ses memoires, & de l'affection qu'il portoit à son Roy, & à sa patrie, & m'ordonna de parachever son dessein: Ce qu'estant venu à la cognoissance de plusieurs personnages de qualité, & de Science exquise, ils m'auroient conuié instamment d'y satisfaire; Ce que leur ayant en fin accordé, poussé seulement du desir de profiter au public, ie me suis efforcé, au mieux qu'il m'a esté possible, de saine reimprimer ce Livre, & de contribuer par mon Estude, par mon Travail, & par la Pratique que j'ay acquise en la Fortification, de le rendre accompli. Je l'ay enrichy de plusieurs Figures, & y ay augmenté quelques discours necessaires pour parvenir à une facile intelligence de ce qui y est proposé. J'y ay encor' adjousté une Table Methodique, qui fait veoir entièrement & succincement le project du contenu en cét ouvrage. Et apres avoir recogneu qu'és precedentes Editions il se rencontroit quantité de difficultez, prouvenances de la Demonstration, confuse avec la Construcion; j'ay aduisé, pour le soulagement des Esprits moins verséz en l'Art de Fortification, & pour descombarasser celuy de l'Apprenty, de mettre à part la Construcion, & d'en faire chacune Figure separée. Et quant au mot d'ART, dont i'use souvent en ce Livre, Vous serez aduertý que ie l'ay estimé plus conuenable au subiect de mon discours, que le mot de SCIENCE; par-ce que ie rapporte le tout à la Pratique, qui est le but & la fin de ceste institution; ne me contentant de la simple cognoissance par ses causes, qui est le propre de la Science, combien que ie n'y propose rien qui ne soit, ou qui ne puisse estre demonstre par les principes des Sciences de Mathematiques. Que si en quelque lieu ie prononce le mot de Science, j'entends pourtant une Science Pratique, qui équipole au mot d'Art, & s'oppose à la Science Speculatiue, qui n'a autre fin que la cognoissance: Bien vous soit. A DIEU.



## A V R O Y.

I R E,



Plusieurs grands Monarques, de tous temps, apres auoir faict quelque notable exploit de guerre, ont desiré d'en voir ou la description en vne histoire, ou le pourtrait en vn tableau; ne prenans moins de plaisir en l'une ou l'autre representation faite par de bons maistres, qu'ils auoient pris de peine, & subi de perils és executions faites par eux-mesmes. Les Turcs sont estimez autant contraires à ces deux choses, principalement à la peinture, comme ils

sont ennemis du nom Chrestien: & toute fois nous lisons de ce grand & redoutable Mahomet secôd, qui conquist deux Empires, quatre Royaumes, & plusieurs villes & Isles, qu'il estoit tres-soigneux à garantir ses faits de l'oubliance, tant par l'eloquence de doctes escriuains, que par l'industrie d'excellents Peintres: esleuant en honneur vn pauvre esclau qui auoit bien descrit en langue Turquesque & Italienne, la victoire obtenue par luy contre Vn Cassan Roy de Perse, & faisant de grands presens à vn Peintre, qu'il auoit faict venir de Venise, pour employer son Art au mesme sujet. Les admirables victoires, & plus que Heroiques exploits de vostre Majesté, SIRE, ont tellement remply la terre, tellement rayuy les yeux & les oreilles de tout le monde, qu'il n'y a langue si diserte, ny main si industrieuse, qui olast entreprendre de les représenter dignemēt en l'une ou en l'autre maniere. Ce que le plus grand Orateur du monde en diroit, pourroit bien surpasser la croyance; mais il ne scauroit égaler la verité: Ce que la plus docte plume, ou le plus habile pinceau traceroit, tesmoigneroit plustost la foiblesse de l'ouurier, qu'il n'exprimeroit l'excellence du sujet. Mais combien que ceste felicité, que Dieu par le moyen de vostre inuincible magnanimité nous a donnée, se face plustost sentir aux cœurs, & aux corps, qu'elle ne se laisse voir en vn liure, ou en vn tableau, combien aussi que vostre Majesté ne demande autre fruiet de ses labours & perils, que ce repos, ceste seurété & tranquillité qui en est prouuenue à ses sujets: Ce seroit neantmoins vne ingratitude trop indigne, si ceux que Dieu a douiez de quelque industrie, ne l'employoient toute à représenter, au moins quelques ombres des choses dont le corps & la verité excède les bornes de l'Art, & de toute puissance humaine, appliquant au reste le bandeau de Timanthes, à ce qui ne pourroit estre depeint par le pinceau d'un Appelles, ny descrit par la plume d'un Xenophon, qui a esté luy-mesme & le sujet & l'escriuain de son histoire.

Or estimant plus à propos d'exceiter les autres par mon exemple, que de les exhorter par mes paroles à leur deuoir; j'ay essayé à rediger par escrit, & à esclaircir par figures, vne matiere en laquelle il a plu à Dieu, par le passé, exercer (comme en vne lice ordinaire) vostre inimitable vertu & generosité, & ce dès la premiere ieunesse, en laquelle aussi elle a jetté des rayons si luisans de sa diuine vigueur, que tout le monde en demeure éblouy. Ceste matiere est, de la maniere d'assiéger, fortifier, assaillir, & defendre les places: matiere dont il ne se peut trouuer sur la terre habitable, ny luge plus competent, ny Praticien plus expert, ny Prince plus digne; & comme i'espere, plus prompt à receuoir en sa protection les escrits qui en traittent, que vous, SIRE, qui seul pouuez plus dextrement mettre en execution les reigles de cet Art, que les plus excellents escriuains ne les peuuent mettre sur le papier: qui auez plus respendu de vostre sueur, & de sang à les verifier par la pratique, que les autres ne scauroient employer d'ancre à les demonstrier en la Theorique. C'est pourquoy i'ose consacrer à vostre Majesté ce mien labeur, pour y faire voir (bien qu'obscurément) vne partie des vostres, dont la grandeur ne sera moins incroyable à la posterité, que le fruit en est salutaire au siecle present, qui ne les peut recognoistre que par vœux & prieres ordinaires à Dieu, pour vostre prosperité, en laquelle vn chacun estime la sienne estre enclose: C'est ce Tout-puissant que ie prie,

SIRE,

*De donner à vostre Majesté longue & parfaite iouyssance du fruit de ses travaux,  
comblant son Regne de toutes ses graces & benedictions.*

Vostre tres-humble, tres-obéissant, & tres-fidele  
seruiteur, I. ERRARD.





# P R E F A C E

## A LA NOBLESSE FRANÇOISE.



*I les bons Oeconomés serrent & conseruent en Esté ce qui leur sera necessaire en Hyuer : Si les bons Pilotes preparent en Hyuer les vaisseaux pour s'en seruir l'Esté : Les sages Princes qui n'ont moins de soing de leur Estat, qu'un Pere de famille de sa maison, qu'un Pilote de son nauire : en quelque saison qu'ils se trouuent, soit en l'Esté d'une florissante Paix, ou en l'Hyuer d'une fascheuse guerre, obseruent & conseruent encor plus curieusement en l'une, ce qui pourra seruir en l'autre. Et ayant besoin d'un grand nombre de toutes sortes d'instruments, pour la conduite d'un si grand vaisseau, à sçauoir d'un Royaume : ils ont aussi besoin d'une tres-grande, voire d'une diuine prudence, à les bien choisir & discerner, pour employer un chacun à ce qui luy est propre. Or comme Dieu desue, ou oste ce don aux Princes, quand il veut punir leurs sujets, & ruiner leurs Estats : aussi le leur donne & conserue-il, quand il veut benir & maintenir les uns & les autres.*

*Il n'y a si auengle qui ne voye, ny si malin qui ne confesse, que le Roy des Roys n'ait departy au nostre ceste excellente grace, en toute perfection, puis que durant le Calme de la Paix (dont par son moyen Dieu nous fait iouyr) il ne faict paroistre moins de dexterité à ordonner un chacun à l'exercice auquel il le cognoist propre, qu'il faisoit n'agueres aux tempestes de la guerre, en rangeant & disposant les batailles. Et d'autant qu'il ne mesprise aucun de ses moindres instruments, principalement de ceux qu'il a employez, & esprouuez : il luy a pleu m'ordonner par son commandement, & conuiier par sa liberalité, à reduire en Art, & à mettre au iour tout ce qui se pratique au faict des Fortifications, afin de soulager par ceste instruction la peine que vous prenez. (Messieurs) à vous rendre autant capables de seruir dignement sa Majesté, & vostre Patrie, comme vous estes spécialement appelez. & obligez à defendre constamment l'un & l'autre : Iointz que ce loisir de la Paix presente, ne peut estre plus louablement employé par ceux qui sont les nerfs de la guerre, qu'à acquerir une certaine & solide cognoissance de ce qu'il faudra mettre en pratique au premier changement : la Pratique estant aussi auengle sans la Theorique, que la Theorique est manchotte sans la Pratique.*

*Ce commandement du Roy, accompagné de sa Royale liberalité, m'a tellement enhardy, que j'ay ozé entreprendre ce que trois lès Ingenieurs, iusques à present, n'ont voulu, ou ozé : au moins n'en paroist-il rien par aucun escrit traitant de ceste science : Car les discours des choses mechaniques ne meritent point ce titre ; n'estant icy question*



des traits, qui à quelqu'un pourroient reüssir à l'aduanture : mais de demonstrations Geometriques, qui donnent à tous assurance infailible. Quicquid se fie en ceux-là, ne haïrde moins le salut d'un pays, qu'un autre la vie d'un homme, qu'il commet à un ignorant Empirique, lequel (comme dit Platon) deuroit avoir passé par toutes les maladies & accidents, dont il veut iuger : autrement il ressemble à celui qui peindroit bien la mer, des escueils, & des nauires ; mais s'il faut venir à l'effect, il ne sçait comment s'y prendre. Si anciennement aux jeux Olimpiques on faisoit faire serment aux Athletes en les enrollant, qui s'estoient preparez, & exercez, par l'espace de dix mois continuels, deuant que se presenter : il y auroit beaucoup plus de raison, de tirer preuue & assurance certaine de la suffisance de ceux qui sont profession, non de recreer un peuple par jeux & passe-temps, mais de le garantir de ruine par leur art & industrie. Or ie ne doute point que plusieurs Ingenieurs, qui ont les dents plus aigues à rôger les ouurages d'autrui, que l'esprit d'en produire d'utiles, de leur inuention, n'ayans rien chez eux, qui merite la lumiere ; ne s'aschent à noircir par la fumée de leur detraction ce mien labeur : soit à mespriser l'inuention, ou à reprendre la disposition & la maniere dont ie traite ceste matiere : Mais qu'ils se souuiennent du gentil trait dont Christofle Colomb se moque de ses mocqueurs, si habiles à raualler l'honneur deu à sa vertu, & si lourdaus à faire tenir debout un œuf : J'estime qu'il me sera permis, aussi bien qu'au Poëte Achille, condamné par la sentence de quelques enuieux Rimasseurs, d'appeler du iugement des ignorans, au Temps, & à la Posterité. J'espere aussi que vous (Messieurs) comme vous estes Iuges plus competents, que ceux-là de telles choses, dont vous auez acquis l'experience aux despens de vostre sang, & au peril de vostre vie : aussi prononcerez-vous une plus équitable sentence sur ce labeur, que j'ay entrepris, tant pour obeyr à nostre Roy, que pour faciliter vostre Estude en tels exercices, & pour laisser quelque instruction à ceux qui un iour succederont, & à vos charges, & à vostre genereuse fidelité & constance, à defendre contre tout effort les places que sa Majesté vous a commises : le m'ose promettre que ceux qui apres la lecture de cet escrit en voudront faire quelque essay, remarqueront un tres-bon accord entre les Reigles de la Science, & les Exemples de la Pratique, tout au rebours de la plus-part des liures traittans ce sujet, qui par le tiltre & inscription promettent merueilles, mais à l'effect se trouuent du tout inutiles ; & pour ceste raison pourroient bien estre accompagnez à ces Nauires, ausquels l'on dône des noms specieux & magnifiques : à l'un la victoire, à l'autre l'invincible, &c. Mais quand ils sont en la Mer, ils ne se monstrent moins fragiles & assez, à submerger que les autres.







LE PREMIER LIVRE  
DE LA FORTIFICATION  
DEMONSTREE ET  
REDVITE EN ART,

PAR FEV I. ERRARD, DE BAR-LE-DVC,  
INGENIEVR ORDINAIRE DV ROY.

Reueu, Corrigé & Augmenté par A. Errard, son Nepueu,  
aussi Ingenieur ordinaire du Roy, suiuant  
les memoires de l'Auteur.

**D**'Autant que les definitions de ceste Science sont si communes & vulgaires, qu'il n'y a personne curieuse de la Fortification, qui ne sçache que c'est de Fossé, Rampart, Escarpe, Contrescarpe, Muraille, Talu, Courridor, Parapet, Chemin couuert, &c. J'ay estimé n'estre pas necessaire commencer par icelles, ny les rediger par escrit, non-plus que les definitions des Lignes, Angles, Cercles, & autres qui sont au commencement du premier Liure des Elements d'Euclide: Considerant aussi que les choses qui naistront de ce discours, aurons leur nom, chacune en son lieu.



# LES AXIOMES QVI SONT SENTENCES COMMVNES.

N'AYANS BESOIN D'AVCVNE  
DEMONSTRATION.

## LA PREMIERE.

Ceste est la mesure du Pied François.



ES FORTERESSES sont faictes, afin qu'une petite force resiste à vne grande, ou petit nombre d'hommes à vn grand nombre.

*La seconde*, L'ART de fortifier les places, & les defendre, procede de la Science d'attaquer & assaillir.

*La troisieme*, L'ART d'attaquer a esté diuers, selon le temps de l'inuention des machines propres à ruiner.

*La quatrieme*, La plus furieuse sorte d'attaquer, est la moderne, qui se faict par le moyen de la Poudre, & de l'Artillerie.

*La cinquieme*, La violence, ou force d'une mesme Poudre, n'est point diuerse, si ce n'est à cause de la diuersité de l'Artillerie.

*La sixieme*, Les pieces d'Artillerie plus communes & vulgaires à ruiner & demolir, sont les pieces portans Calibres de trente à quarante-cinq liures.

*Comme en France, de trente-trois un tiers; En Flandre, de quarante-cinq; En Allemagne, de semblable poids, ou environ. Je ne parle point de double Canons, ny Basilics, qui pour la grande charge de leur pesanteur, sont fort peu usitez.*

Et pour-ce qu'il est necessaire en construisant vne Forteresse, de conseruer les lieux & espaces necessaires tant pour conduire, que pour placer l'Artillerie, on sera aduertey,

*Premierement*, Que la mesure commune de France, est la Thoise, qui contient six Pieds François (autrement de Roy) en longueur, & chacun Pied, douze Poulces, & chacun Poulce, douze parties (qu'on appelle entre les Mechaniques, Lignes;) ainsi qu'il est marqué en la Marge de ceste Page.

*Secondement*, Le Pas commun est de trois Pieds & demy, François; & le Pas Geometrique, de cinq.


*Commun*, à cause que toutes personnes (ou la plus-part) en marchant sans contrainte, ou dessein, font cet espace en un Pas: Geometrique, à cause que celuy qui mesure, entreprend d'auantage que l'ordinaire, pour expedier matiere; & par ce moyen, montre auoir quelque dessein: Cecy soit dict en passant; mais cy-apres il ne sera parlé que de pas communs.

*Tiercement*, Que le Canon de France a de longueur enuiron dix Pieds, & son Fuſt quatorze: Et eſtant monté ſur ſon Fuſt, enuiron dix-neuf Pieds: Sa Balle, peſant trente-trois liures vn tiers, a demy Pied, c'eſt à dire, ſix Poulces de Diamètre.

Ce mot de Palla  
servira pour le  
Canon, & pour  
les autres piéces au  
désous.


Quarrement, Que la largeur du mesme Fust (laquelle se considere en l'Essieu) est de sept pieds.

Ceci se verra par ceste Figure, & la suivante, esquelles j'ay remarqué toutes les proportions, tant du Canon François, que de son Affust; avec toutes les pieces & ferrures necessaires à iceluy; comme aussi au Rouage; desquelles j'ay escript les noms à l'endroict de chacune, & fait renvoy par Lettres, pour le soulagement des Lecteurs. J'y ay aussi tracé la longueur & grosseur de la



## Premier Liure

Coulverine, Baslarde, Moyenne, Faucon, & Fauconneau, montées sur leurs Affusts, qui sont les six Calibres qu'on a accoustumé de faire en France; desquelles six sortes d'Arillerie, le nombre & poids tant de leurs Metaux, Bois d'Affust, que Romages avec toutes les Pieces & Ferrures propres & convenables à iceux, seront cy-apres amplement spécifiés. Et tout cecy n'est point pour arrester aucun à cette proportion: car il est certain que les bons Esprits augmentent ou diminuent les Inuentions, pour les rendre plus utiles & faciles: loinct aussi que les trois dernieres Pieces, comme Moyenne, Faucon, & Fauconneau, se font pour la plus-part à la discretion des bons Fondeurs, & autres personnes bien experimentez. Le Lecteur remarquera aussi en passant, que les mots sont fort corrompus, & ne sont point significatifs, comme estoient les anciens noms: mais il suffira de se faire entendre.





# S'ENSVIT LA PESANTEVR DV CANON, COVLEVRINE, BASTARDE.

MOYENNE, FAVCON, ET FAVCONNEAV ; AVEC  
LE DENOMBREMENT ET POIDS DE TOVTES  
LES PIECES NECESSAIRES POVR LA FERRVRE  
des Affusts & Rouïages d'iceux.

## P R E M I E R E M E N T.



**L**E METAIL du Canon pese enuiron quatre mil. huit cens liures.

Le Boys d'Affust, Coings & Leuiers, douze cens liures.

Le Boys de Rouïages six cens cinquante liures.

Les Emboitures de Fonte, qui se mettent au-dedans des Moyeux, deux cens liures.

Pour la Ferrure des deux Costez du Boys d'Affust, qu'on nomme Flasques, sur le deuant, & au dessous d'iceux, faut deux Soubz-Bandes.

Deux Sus-Bandes, qui se mettent par-dessus le Tourillon.

Huict Cheuilles à teste quarrée, garnies de leurs Gouppilles, pour tenir lescdites Bandes.

Deux Hurtois, qui se mettent au derriere du Tourillon.

Deux Esquaires, garnies de quatre Boulons, pour mettre derriere les Hurtois.

Deux Crochets de Retraite.

Trois Boulons, pour ruer l'Affust ; deux à teste plate, & l'autre à teste ronde.

Deux Bandes de bout d'Affust, avec deux douzaine de Cloux à teste ronde, pour attacher lescdites Bandes.

Vne Gouttiere, pour mettre à la Culasse, & bout d'Affust, avec huict Cloux pour tenir ladite Gouttiere.

Deux Esquaires à mettre sur ladite Gouttiere, avec douze Cloux à teste ronde, pour attacher lescdites Esquaires.

Deux Clauettes de Limon, avec deux Cheuilles pour tirer lescdites Clauettes.

Plus deux Cheuilles à Clauettes, garnies de leurs Chaînes, qu'on appelle Repos, avec deux Crampons à deux pointes, pour tenir lescdites Cheuilles.

Deux Boulons, pour tenir les Limons ; avec leurs Rondelles.

Deux Museaux de Limons, avec deux Liens, pour tenir lescdits Museaux.

Deux Bandes de Limons.

## Premier Liure

Deux Ragots pour lesdits Limons.  
Plus deux grosses Attreloires.

*Toutes lesquelles pieces de Ferrures cy-dessus mentionnées, necessaires au Boys d'Affust dudit Canon, peseront ensemble la quantité de quatre cens dix-sept liures, ou enuiron.*

Pour la Ferrure du Boys de Rouage, faut à chacun Moyeu quatre Frettes, qui sont pour les deux, huit Frettes; sçauoir quatre grandes, & quatre petites.

Six Clefs pour faire tenir les Frettes joignant les Raiz des Roües.

• Vingt-quatre Cloux à Caboche, pour cloier lesdites Frettes.

Six grandes Bandes à chacune Roüe, qui se mettent sur le pas des jentes, qui sont pour les deux Roües ensemble douze grandes Bandes.

Pour cloier lesdites Bandes, faut douze douzaines de gros Cloux à Corterets, & à grosse teste ronde.

Au dessous desdites Bandes se mettent à chacune Roüe douze Liens, Sous-Bandes, qui sont pour les deux Roües ensemble, vingt-quatre Liens garnis de leurs Cheuilles à Clauettes.

Faut autant de Liens Sus-Bandes, garnis aussi de leurs Cheuilles.

Quatorze Crampons d'Emboitures.

Pour ferrer l'Essieu, faut quatre Happes.

Deux Museaux d'Essieu.

Trente-six Cloux à Happes pour ledit Essieu.

Plus deux grosses Heuilles, ou Oz, pour tenir les Roües dedans l'Essieu.

*Toutes lesquelles Pieces de Ferrures cy-dessus décrites, seruantes au Boys de Rouage, pesent ensemble la quantité de six cens liures, ou enuiron.*

Partant le Canon monté sur son Affust Ferré, & prest à marcher en Campagne, pesera la quantité de sept mil huit cens soixante-sept liures, ou enuiron.

Plus les Cornblans, ou Combleaux (qui se deuroient nommer Cableaux) & autres Cordages, propres & viles audit Canon, avec les Chargeoirs; peseront ensemble enuiron cent cinquante liures.



## DE LA COVLEVRINE.



**P**OUR le regard de la Coulevrine, Bastarde, Moyenne, Faucon, & Fauconneau, il faut le mesme nombre, & quantité de pieces de Ferrures, qu'au Canon; mais différentes de poids: comme aussi de Metail, Boys d'Affust, & Rouage.

Pour le Metail, trois mil sept cens liures.

Le Bois d'Affust, Coings, & Leuiers, sept cens huitante liures.

La Ferrure dudit Bois d'Affust, trois cens cinquante liures.

Le Boys

Le Boys de Rouage, quatre cens soixante liures.

La Ferrure dudit Rouage, cinq cens liures.

Les Emboitures, cent vingt liures.

*Nombre total pour ladite Coulevrine, montée sur son Affust ferré, cinq mil neuf cens dix liures.*

Plus les Comblans, & autres Cordages nécessaires à ladite Coulevrine, avec les Chargeoirs, peseront ensemble enuiron cent liures.

Son Boulet a quatre roulées dix Lignes de Dyamètre, & pèse seize liures & demye.



## DE LA BASTARDE.



**P**OUR le Metal de la Bastarde, deux mil cinq cens liures.

Le Boys d'Affust, Coings, & Leulers, cinq cens nonante-cinq liures.

La Ferrure dudit Affust, trois cens cinquante liures.

Le Boys de Rouage, quatre cens cinq liures.

La Ferrure d'iceluy, trois cens soixante & dix liures.

Les Emboitures, cent dix liures.

*Nombre total pour la pesantier de la Bastarde, montée sur son Rust, quatre mil trois cens trente liures.*

Plus les Combleaux, & autres Cordages nécessaires à ladite Bastarde, avec les Chargeoirs, peseront ensemble la quantité de quatre-vingts liures.

Son Boulet ayant trois roulées, huit lignes, pèlera sept liures & demye.



## DE LA MOYENNE.



**P**OUR le Metal de la Moyenne, quinze cens liures.

Le Boys d'Affust, &c. quatre cens soixante liures.

La Ferrure dudit Affust, quatre-vingts dix liures.

Le Boys de Rouage, deux cens quatre-vingts liures.

La Ferrure d'iceluy, avec ses Emboitures de fer, deux cens soixante liures.

*Nombre total de la pesantier de la Moyenne, montée sur son Affust, deux mil cinq cens quatre-vingts dix liures.*



D'autant qu'en ceste piece d'Artillerie, & es deux suivantes, il n'est besoin que de Cordages communs, ie ne me suis arresté à descrire leurs poids, ains seulement de leurs Boulets dont celuy de ladite Moyenne ayant pour Diametre trois Poulces trois Lignes, pesera deux liures trois quarts de liures.



## DV FAVCON



OVR le Metal du Faucon, il peut peser enuiron huit cens liures.  
Le Boys d'Affust, & Ferrure d'iceluy, soixante & dix liures.  
Le Rouïage Ferré, quatre-vingts dix liures.

Nombre total de la pesanteur dudit Faucon, monté sur son Affust, neuf cens soixante liures.

Son Boulet a pour Dyamètre trois Poulces moins deux Lignes, & pese vne liure & demye.



## DV FAVCONNEAU



OVR le Metal du Fauconneau, il peut peser enuiron sept cens quarante liures.  
L'Affust d'iceluy, ferré, soixante liures.  
Le Rouïage, ferré, quatre-vingts liures.

Nombre total de la pesanteur dudit Fauconneau, monté sur son Affust, huit cens quatre-vingts liures.

Son Boulet a pour Dyamètre deux Poulces moins demye Ligne, & pese trois quarts & demy.

Le Lecteur sera aduertuy en passant, qu'encor que i'ay dict cy-deuant que le mesme nombre de pieces de Ferrures specifié au Canon, est requis en toutes les pieces d'Artillerie suivantes; si est-ce qu'es trois dernières on en peut retrancher quelques-vnes, comme des Lyons tant sous-bandes que sus-bandes, & autres.



## DV CANON, DE SA LONGVEVR,

DV CALIBRE, DE LA POVDRE, ET DES  
PROPORTIONS NECESSAIRES.

## CHAPITRE PREMIER.



Vis que le Canon & la Poudre sont comme l'ame d'une armée assiégeante, il sera bon d'en traiter, & examiner leur force & violence, afin qu'en construisant la forteresse, on leur puisse opposer les remedes necessaires.

Toute l'experience qui iusques auourd'huy a esté faicte do l'artillerie, & de la poudre, n'a peu faire cognoistre qu'elle est la vraye & iuste proportion du calibre, longueur, & de la poudre ensemble.

La coustume & reigle de charger le canon, & autres pieces, est diuerses, selon la valeur de la poudre.

Il ne s'est neantmoins, iusques à present, trouué homme qui ayt rendu raison, ny monstré la vraye & iuste proportion du canon, de son calibre, & de sa charge, selon la valeur de la poudre.

Par l'experience que le seigneur de Linar a faict faire en Allemagne, il s'est trouué que la violence du canon de douze pieds de longueur, est égale à celle du canon de treize iusques à dix-sept.

Il semble que la raison de cecy soit, que l'exhalation de la poudre, apres douze pieds, ne pousse plus la balle.

Quand à la valeur & violence de la poudre, en diuers calibres, & diuerses longueurs, il est difficile d'en iuger: car par l'experience ordinaire, on cognoist que la proportion du petit au grand, ne se rapporte en aucune façon.

Il y a donc vne certaine proportion entre la longueur du canon, & son calibre: & entre tous les deux, & la poudre; & ce qui est par dessus, est inutile; & ce qui est au dessous, faict defaillir & manquer.

Suiuant la figure precedente, la proportion du canon, & de son calibre, sera, qu'il doit auoir en longueur (la balle estant posée de demy pied de diametre) dix-neuf longueurs de diametre d'icelle balle, à prendre depuis l'emboucheure iusques à la platebande & culasse. Par derriere au droit d'icelle platebande, trois diametres de la balle, & à l'emboucheure deux: La bouche doit estre de six poudces, & quelque peu plus, comme deux lignes pour l'air & le jeu de la balle. Au droit du Tourillón doit auoir deux diametres vn tiers, lequel doit estre de la grosseur de la balle: & pour estre bié posé, faut mesurer le milieu de la piece auquel se fait le renfort & moulure, & le mettre vne longueur de diametre plus derriere, tirant vers la culasse.

Pour bien proportionner le canon avec son affust, & le bien balancer sur iceluy, suiuant la description de la figure cy-dessus, faudra qu'il y ait depuis le bout de deuant de l'affust, iusques au tourillon, dix poudces de longueur. Et y a pareille proportion en toutes les autres pieces.

*Extrême du canon.*

*Les douze pieds, selon la mesure du pays, neuent canon de dix pieds François.*

*Proportion necessaire entre le longueur du canon, son calibre, & la poudre.*



# DE LA FACON DES BATTERIES.


## ET DES EFFECTS D'ICELLES.

### CHAPITRE II



T d'autant que la force & violence d'une mesme poudre est semblable & égale par tout en vn mesme Canon, il sera bon sçavoir quels sont les effects de plusieurs pieces ensemble, & de quelle façon on en use pour les rendre plus grands.

L'experience faict cognoistre que les batteries qui se dressent de part & d'autre, d'un angle en se croisant, (comme A & B, à l'entour de l'angle CDE) font bien vne plus grande ruïne, qu'une batterie simplement de front; & semble que la raison soit, que celle-cy n'esbranle tousiours que d'une mesme sorte: mais l'autre abat & renuerse, (principalement si les pieces sont tirées d'un mesme temps, & à propos, comme nous voyons souuent plusieurs choses subsister, & demeurer debout, n'estans poussées ou esbranlées que d'une sorte, & tomber facilement si elles sont en mesme temps chocquées diuersement.



*Batterie creu-  
sée.*

Par le moyen de telles batteries, on a veu démolir & reduire en poudre, en peu de temps, de grandes masses de murailles, & terraces fort amples, non sans grand effroy & estonnement des assiegez, qui souuent leur oste le iugement d'y donner remede.

Faut encore noter par la mesme experience, que mil coups tirez promptement avec dix canons, font plus de ruïne que quinze cents tirez avec cinq canons.

Par ceste façon les assiegez peuuent auoir quelque temps & moyens de reparet les breches & ruynes, & par celle-là les assiegeans en ostent tous moyens aux assiegez, à cause de la promptitude & diligence des bons canonniers, & par la frequente & continuelle tempeste de l'artillerie.

La mesme experience monstre encore, qu'un coup de canon tiré à propos, & selon l'art, dans vne terrace, ruynera plus qu'on ne peut reestabli avec cinquante hottée de terre. Tellement que selon le nombre des pieces & valeur des murailles, & terraces, les assiegez pourront aucunement iuger de la ruïne, & par consequent des reparations necessaires: qui est vne des considerations principales que doit auoir vn bon Ingenieur ou Capitaine, qui attend vn siege, comme il sera dit cy-apres.

Et pource que l'artillerie doit le plus souuent seruir à deux effects: sc̄auoir à faire brèche, & empescher le travail des assiegez: il est bien euident qu'un seul coup tiré en vn demy quart d'heure, comme il a esté dict, ne peut faire cét empeschement: Tellement que les assaillans ont donc égard au travail que peuuent faire les assaillis pendant ce demy quart d'heure, pour y apportet vn empeschement continuel.

Ce que nous recognoissons par pratique ordinaire, est, qu'un homme peut de cent pas porter en vne heure enuiron trente hottées de terre: tellement que douze hommes peuuent, sans hazard de leur vie, reestabli en mesme temps ce qu'un coup de canon aura ruyné de rempart; & vn chacun fera trente, ou trenre-deux voyages à la brèche: dont s'ensuit que si on bat avec douze canons, on empeschera non seulement le travail des douze hommes, mais de plus grand nombre, estans les quatre-vingts seize coups de canons tirez d'une entre-suitte si soudaine, qu'ils ne laissent point de temps aux assailliz pour travailler sans grand petil.

Il s'ensuiura donc qu'il faut à vne armee assaillante pour le moins douze canons.

On peut adiouster deux ou trois couleuines ou quelques bastardes, pour empescher les sorties, & autre travail.

Or douze canons estans bien placez, & employez, avec ceste diligence, ruynent avec douze mille coups, vn rempart de douze toise d'espaisseur, ou enuiron.

De cecy ie n'en apporte autre raison que l'experience ordinaire: car ie conuiendray facilement d'une toise ou deux de plus ou moins, pour establi ce principe: dont sera euident que quatorze canons faisans plus de ruïne que douze; seize que quatorze, & ainsi consequemment (sans qu'on en puisse neantmoins rien dire de preciz, faute de si diuets experiences) il faudra augmenter l'espaisseur des remparts selon le surcroist des batteries, non toutesfois en mesme proportion; d'autant que les dernieres toises ne sont si faciles à ruynier que les premietes, comme chacun scait.

*Ce que peut  
ruiner vn ca-  
non.  
Vne hottée de  
terre est pesée la  
charge commu-  
ne d'un hom-  
me.  
Consideration  
notable.*

*Preuant les ter-  
res plus pres,  
seroit gager le  
leur destiner  
pour l'assemblée  
des gens de  
guerre, &  
pour les retran-  
chemens.*

*La moindre ar-  
mée doit auoir  
dix canons.*



# DE LA PROPORTION D'VNE ARMÉE CONQUÉRANTE, DE SES MUNI- TIONS ET ARTILLERIES.

## CHAPITRE III.



**O** R le Canon & la Poudre estans l'ame d'une armée assail-  
lante, (comme il a esté dict) & les choses les plus requises &  
nécessaires en icelle, les assiegez doiuent iuger de la gran-  
deur d'icelle armée par le nombre des pieces & munitions  
qu'elle meine, ou iuger du nombre des pieces & munitions  
par le nombre d'hommes & gens de guerre qui la composent.

*Proportion  
d'une armée,  
& de son ar-  
tilerie.*

Car comme il y a proportion, ou doit auoir, entre vne  
armée, & les commoditez du pays qui la soutient; (com-  
me chacun sçait) ainsi y doit-il auoir proportion entre le

nombre des pieces d'artilleries, avec la quantité de poudres & balles, & l'armée qui les  
conduit & garde. Cecy est si clair, que ie croy n'estre besoin de descrire le deliordre  
qui autrement en aduiendroit.

Ce qui s'est neantmoins peu cognoistre, tant par les armées Chrestiennes, que autres,  
est de donner à mil hommes de pied vn canon, mil balles, & la poudre nécessaire pour les  
employer: Sçauoir pour vne charrette à trois bons chevaux, trente-trois balles; c'est à  
dire, dix chevaux pour vn cent de balles, qui pezeront vnze cents liures; & cent chevaux  
pour mil balles, qui pezeront trente-trois mil liures.

*Parce que la  
Cavalierie n'est  
point sujette à  
l'Artillerie.*

Pour les chars & charrettes qui meneront la poudre, pezent enuiron vingt-deux  
mil liures (pour estre les deux tiers de la pezanter des balles) soixante-six chevaux.

Pour menet & trainer le Canon monté, vingt-deux chevaux, puis quatre charrettes de  
douze chevaux pour mener les enclumes, soufflets, marteaux, & autres ferailles, avec quel-  
ques pavillons & tentes: Tellement que l'attirail d'un Canon peut estre de deux cents  
chevaux, ou enuiron.

Il me semble n'estre hors de propos de descrire encore sommairement quelque chose  
de la conduite de l'artillerie en vne armée conquérante; d'autant que ceste cognoissance  
pourra seruir à ceux qui s'attendent d'estre assiegez, tant pour se preparer à se bien defen-  
dre, & entreprendre avec aduantage, que pour s'abstenir d'entreprendre mal à propos, &  
se laisser assieget & renfermer dedans vne place mal fortifiée, degarnie de toutes sortes de  
munitions, & sans espoir d'estre bien tost secourus.

En l'auant-garde on meine ordinairement vn nombre de menuës pieces, comme  
Baltardes, & Moyennes; lequel nombre est neantmoins selon la discretion du General  
d'armée, & du grand Maistre de l'Artillerie, qui le feront rapporter à la proportion de  
l'armée.

En la bataille sont les Canons & Couleurines en nombre proportionné.

En l'arrière-garde sont semblables pieces qu'en l'avant-garde, selon la mesme discretion.

Ordinairement l'Infanterie la mieux armée est es environs de l'artillerie, & la Cavalerie sur les ailles de l'armée.

Et pource que l'attelage du Canon est de moindre frais que son autre attirail, & qu'il y a souvent incertitude en la fonte, comme l'experience n'en est que trop frequente, le general d'armée fait quelquesfois doubler le nombre des pieces, seulement pour faire les batteries plus grandes & furieuses, & gagner le temps : par ainsi tout l'attirail d'un seul Canon seroit environ cent chevaux, & faudroit donner deux Canons à mil hommes de pied : Mais posant les pieces estre de bonne & loyale fonte, pouuans endurer l'espreuve deuant dictes, (comme il est à presumer que le General d'armée, bien preuoyant, n'en receura point d'autres) cela demeurera pour constant, que l'attirail d'un seul Canon, avec les munitions pour mil coups, sera deux cents chevaux, ou environ.

Ioin & aussi que les assaillis preuoyans, peuuent auoir fait preparatif de balles de layne, & autres choses semblables, qui surpassent en peu de temps le trauail ordinaire des hotiers.

*Regle change.* Ceste reigle neantmoins se change selon la diuersité des lieux, comme es places maritimes, où on peut plus charger sur un seul vaisseau, que mil chevaux ne peuuent traîner : ou es autres places frontieres, contre lesquelles les ennemys pourront faire secrettement un appareil extraordinaire, pour l'employer tout à coup, & en si peu de temps que la place avec les assiegez, en seront en hazard. Et au contraire, quand le pays est montagneux, couuert de bois, ou marescageux, qui empesche le charroy, & est d'armée en trop grande longueur, ne pouuans plus generalement faire entendre les alarmes qui se donnent par les coups de Canons en la campagne, comme par les cloches en une ville, & ne pouuant promptement secourir les extremités assaillies.

Ces choses bien considerées nous peuuent en fin amener à la proportion du nombre des assaillans, avec tout leur attirail, au nombre des assaillis, avec toute leur prouision : Car il est bien certain que dix hommes, en quelque place que ce soit, fortifiée seulement par Art de Fortification, seront facilement pris par mil assaillans : comme aussi mil hommes en une forte place, ne pourront pas estre pris par mil assaillans (la force corporelle, industrie & vigilance, estant posée égale en tous hommes) jointe aussi qu'il y a proportion necessaire entre la capacité de la place, & le nombre des defendans, comme il sera traité cy-apres.

Puis donc qu'il y a du plus & du moins : C'est à dire qu'une place se peut tellement fortifier, & munir de toutes choses necessaires, qu'elle resistera facilement à tous les efforts de certaine armée : & aussi qu'une armée peut estre dressée & fournie de ce qui sera necessaire, en sorte qu'elle prendra infailliblement certaine place : Il s'ensuiura que l'une & l'autre se pourront tellement compasser, qu'on les rendra par Art égales, & par ce moyen l'une ne sera iamais victorieuse de l'autre.

Car il est bien certain que les places ainsi égalées, & munies, (au regard des assaillans) ne se prennent point que par les accidens qu'y arriuent contre l'opinion des assaillis : comme par la perte des Chefs, qui cause la diuision ; par les pestes, & autres maladies de diuerses sortes, qui viennent de la corruption de l'air ; par putrefaction des prouisions, ou par quelques accidens de foudre, ou autre hazard de feu dans les magasins, ou par quelque nouveau artifice, auquel on ne peut promptement remedier.

Comme en semblable les armées assaillantes ne se ruinent que par tels accidens, ou par mauuaises saisons, & sterilité du pays, qui suruiennet contre l'opinion : tellement qu'il faut que celui qui est le plus incommodé de ces accidens (qu'on ne peut euitier) cede à l'autre : & ainsi sont les places garanties, & les assaillans défaits, ou au contraire.

La proportion donc plus receüe, & commune des assaillans, & assaillis, pour les rendre

*Proportion des  
assaillans &  
assaillis.*

*Cory est le bon  
de ce discours.*



(comme l'aydict) par Art égaux, est à mon aduis, enuiron de dix assaillans contre vn assailly, & de tout l'attirail & prouision de mesme.

*Dix assaillans  
contre vn es-  
sailly.*

Cecy veut dire, que s'il y a dix Canons deuant la place, il y doit auoir dedans la valeur d'un Canon, reduit en plusieurs petites pieces, propres pour la defence, comme en mesme raison des poudres, balles, & cheuaux pour faire le charoy en la place: Car il n'est pas necessaire qu'elle soit par tout defendue de pieces, d'autant que l'assaillant ne la peut pas attaquer par tout.

La raison de cecy se pourroit tirer du discours des histoires, & de l'experience des sieges qui ont esté depuis l'inuention de l'Artillerie; mais elle seroit longue à deduire: i'en laisse l'examen aux bons esprits, qui sont nourris en ces affaires; & ie m'assure qu'ils trouueront que ie n'en suis fort éloigné: car il est tres-difficile, à moi aduis, d'en donner quelque chose de preciz.

Seulement ie diray, en passant, ce que personnes de discours ne peuuent nyer, que le moindre aduantage qu'un homme de guerre a sur vn autre homme de guerre, son ennemy, le rend victorieux, (les hommes posez égaux, comme il est dict) & se trouuera que l'assailly a pour le moins huit aduantages sur l'assaillant, auant qu'ils puissent également venir aux mains: ou pour mieux exprimer, l'assaillant reçoit huit incommoditez, dont l'assailly en est exempt. Pour le premier, d'estre mal logé en vne hutte. Pour le second, decouuert à faire les approches & tranchées. Pour le tiers, de percer la contrescarpe, & entrer dans le fossé. Pour le quatrième, passer le fossé. Pour le cinquième, se couvrir d'en-haut iusques au pied de la brèche. Pour le sixième, monter la ruïne de la brèche. Pour le septième, se parer & garder en montant, des artifices jettez d'en-haut d'icelle. Pour le huitième, combattre estant harassé, & pezamment armé.

*Aduantages  
des assaillans sur  
les assaillans.*

Il se pourroit encor trouuer quelques incommoditez, comme de se loger à couuert, apres auoir gaigné le haut de la brèche, & autres: Mais il suffit de mettre en auant celles-cy, comme estant les plus facheuses, au regard des autres, qui ne peuuent estre que petites.

Je mets expressément ceste proportion d'égalité en auant, afin qu'on cognoisse la ruïne plus euidente de l'assaillant, ou de l'assailly, selon qu'ils s'en éloigneront.

Ce n'est pas qu'il faille tousiours que l'armée soit complete dès-lors que la place commence à estre inuestie; d'autant que le General de l'armée peut receuoir de iour en iour ses commoditez, selon qu'il aura preuue, pour estre fort assez au temps qu'il commencera ses approches, & fera tirer le Canon: qui est le commencement d'un siege formé.

Nous tiendrons donc pour maxime, que quand nous voudrons bastir vne forteresse, il faut auoir égard aux forces de nostre ennemy, afin que la despence rapporte de la commodité, le trauail & le temps, du repos & assurance, selon l'esperance conceüe.

*Maxime ra-  
table.*





# DE LA MVRAILLE. ET

## DE SA MATIERE.

### CHAPITRE V.



N a accoustumé de reueſſir les forterreſſes de murailles, quelques-fois pour ſouſtenir les terraces qui ont peu de liaiſon, & qui d'elles-mêmes ſ'écoulent, & ſe ruynent, quelques-fois auſſi pour reſiſter aux pluyes, gelées, eaux de foſſez, & autres incommoditez; ou bien pour empêcher les ſurpriſes d'eſcalades, qui ſeroient trop faciles au long du tallu des terraces, eſtans les murailles dreſſées plus droictes, moins commodés pour tel eſſet.

Entre les meilleures matieres qui ſe trouuent en noſtre France, celle de Mets eſt fort eſtimée, car on y void encore des murailles coupées par le milieu, à force de cannonnades, du temps que l'empereur Charles cinquième l'aſſiegea; leſquelles neantmoins ſubſiſtent debout: & eſt choſe quaſi incroyable, que des murailles de ſi petite eſpeſſeur, ayans eſté tant battuës de coups de canons, n'ont eſté reduites en poudre. Autre bonne matiere ſe trouue à Sedan, à Meſieres, Bayonne, Boulongne, & en pluſieurs autres endroits, de laquelle n'eſt ja beſoin de parler; & n'eulſſe point allegué les precedentes, ſi non pour quelque cauſe qui ſera declarée en ſon lieu.

Les murailles de matiere douce, comme de briques, croye, & autre pierre tendre, ſeruent auſſi au reueſtement des terraces, & ne ſont pas facilement ruynées, n'eſtans battuës que de front, d'autant que la balle ne faiſt que ſon trou, non-plus qu'en la terre.

Or ſ'il eſtoit neceſſaire de reueſtir de muraille quelque fortification, ie deſirerois apres la bonne matiere, que la muraille; ſçauoir de ſept ou huit pieds d'eſpeſſeur, ou enuiron, fuſt tout à plomb, & de hauteur de ſix pieds hors du fond du foſſé ſec, pour l'eſſet qui ſe dira cy-apres; & aux autres foſſés, iuſques au-deſſus de l'eau ſeulement: puis par deſſus, avec tallu de trois pieds l'un, eſtant bien ſouſtenué par derriere de eſperons de vingt, ou vingt-cinq pieds de longueur, & enuiron de trois d'eſpeſſeur, diſtans l'un de l'autre d'une toize, conſtruits un petit en arcade, avec la muraille; afin qu'au deſſus de quinze, ou vingts pieds, la muraille ne ſoit plus ſur ſon fondement; & qu'icelle eſtant battuë par le pied, ou par le milieu, ſubſiſte touſiours ſur ſes eſperons. Que ſ'il y auoit trop de tallu, ou qu'il n'y en falluſt point du tout, (car il y a pluſieurs matieres qui n'en peuvent ſouffrir, ou bien peu, à cauſe de la pluye, & de la gelée, ſelon les lieux & diuerſité des matieres) il ſeroit beſoin qu'entre les deux eſperons, le corps de la muraille fuſt en arcade, & vouté; & par deſſus ceste arcade, autres grandes arcades, comprenans pluſieurs eſperons, afin qu'eſtant battuë en cét endroit, le deſſus

*Aucuns les appellent courtois ou bontons.*

*Coy ſe void en quelques*


*visibles & an-  
ciennes murail-  
les, basties ausi  
l'invention de  
la poudre, &  
de l'artillerie.*

puisse subsister plus long temps, ainsi qu'il se peut voir en ceste figure, en ce qui est marqué entre G & H; & faut noter que ces arcades ainsi basties avec le corps de la muraille, doivent estre couuertes & cachées au parement, de l'espesceur d'une pierre, ou brique seulement, afin que les ennemis ne les decouurent pour rompre les costez qui les soustiennent. Item, qu'à toute muraille bastie à plomb, ou avec bien peu de rallu, ne faut tellement lier les esperons, qu'icelle en fin tombante, ne les tire en ruine avec soy, ensemble la terre qui aura esté foulée & pressée entre iceux, comme nous en ayons veu quelque experience: Tellement qu'il seroit bon en construisant le corps d'icelle muraille, y observer certaine deliaison à l'endroi& de chacun esperon, depuis la moitié de leur hauteur seulement, iusques en haut, afin que le poids de la muraille tombante soit tousiours plus petit que celui qui resistera.

*Mais ceste dernière inuention peut plus seruir contre la sappe, que contre une grande batterie.*

Pour le regard du tallu en bonnes & fortes matieres, l'inuention d'Albert Durer me semble tres-bonne; c'est de faire autant de pente & tallu en la muraille, que de hauteur, afin que la balle ne donnant point en angles droicts contre icelle, puisse bricoler en amont, & faire moins d'effe&t: mais cecy ne semble point se rapporter à la maxime du chapitre troisieme, à cause du grand coust de telle sorte de muraille, qui surpasse le quadruple des autres: Tellement que ceste inuention, avec la precedente, se peut reseruer seulement pour quelque endroi&t particulier d'une place, comme celles qui seront traitées au troisieme & quatrieme liures, où l'assiette d'icelles donne tel aduantage aux assaillans, qu'on peut facilement iuger que la place sera necessairement battue par tel endroi&t, lequel en ce cas sera bon reuestir de muraille construite de ceste sorte.

Il seroit aussi necessaire qu'au pied de la muraille (hors d'eau & toutesfois, & dedans son espesceur, qui doit tousiours estre plus grande qu'au dessus) il y eust une petite voute de cinq pieds de hauteur, & de deux & demy de largeur, pour seruir de contre-  
mine, avec des soupiraux cachez, & bien couuerts,



Et d'autant qu'en plusieurs lieux les matieres ne peuvent souffrir telle construction de muraille que cy-dessus, & que mesme l'experience a fait cognoistre par les ruynes aduenues, l'erreur de ceux qui par cy-deuant ont voulu s'en seruir, & l'observer de tous points, & en tous lieux & endroits, comme font encore aucuns de ce temps, non experimètez; & en font comme d'une selle à tous cheuaux: & qu'il se pourroit rencontrer telle alieté de place, & nature de terre, qu'il seroit impossible d'y fouiller, ny creuser, pour y faire des esperons, come quand il y a une grand' hauteur de terre sablonneuse, remuée, & coulante, ou de la menuë blocaille, qu'on appelle foizy.

Il sera bon de descrire une maniere de construction de muraille, dont on peut vzer & pratiquer generalement en tous endroits, qui est de, Premièrement considerer la qualité de la terre, si elle est ferme ou remuée coulante, ou non, la hauteur d'icelle, si le fondement est bon, & alors proportionner l'espesseur de ladite muraille à sa hauteur, qui sera de luy donner pour espaisseur par bas, le tiers de sa hauteur, conduicte au parement de deuant en talu de neuf pieds l'un, (c'est à dire, que sur la hauteur de neuf pieds, l'espesseur diminuëra d'un pied) & par derriere, à plomb: Et es lieux où le fossé se pourra remplir d'eau, sera bon de laisser le long de la muraille une banquette de terre de largeur d'environ six pieds, pourueu que ce soit terre ferme, pour empescher que l'eau venant à battre & creuser le pied de la muraille, ne cause la ruïne d'icelle.

Pour les hauteurs des murailles, parce qu'elles se font selon la necessité ou commodité du lieu, & des matieres; Cela demeure au iugement d'un bon Ingenieur; comme aussi s'il y doit auoir un cordon, ou plusieurs, & où il est à propos de les pozer.

*Pratique generale pour la construction de la muraille.*



## DES TERRACES.

### CHAPITRE VI.



Es terraces ou ramparts d'une place doiuent tousiours estre d'espesseur, pour resister à la violence de la batterie de l'assaillant, sans y comprendre les montées.

*Marine.*

Quand la muraille se fait la premiere, & qu'elle est bien soutenüe d'esperons, comme nous auons dit, on doit mettre de fort bonne terre & bien serree entre les esperons, & iusques à la hauteur d'iceux pour demeurer debout en defaut de muraille: puis au bout des esperons eleuer un rampart de mesme terre (si le lieu se donne) avec un talu conuenable. Ce qui se pourra observer en la derniere construction susdite, encore qu'il n'y ait point de esperons, en endossant la muraille de bonne terre, comme dict est.

Ceste distance entre la muraille & le rampart, se fait afin que l'assaillant soit contrainct de battre doublement; sçauoir la muraille premierement, puis le rampart.

Dessus ceste terrasse ainsi eleuëe, se doit faire le parapet, ayant son espaisseur de la longueur de la picque, & au dessous, afin que la defense en soit plus prompte & aysée,

*Parapet.*

pourueu neantmoins que ceste épaisseur ne puisse estre percée d'un coup de canon ; autrement la faudroit faire selon que la necessité le requerroit, pour auoir couuerture assurée, principalement pour les pieces d'artillerie qui sont placées es lieux plus éminens.

Le parapet doit estre de huit ou neuf pieds de hauteur par dedans, afin de couvrir l'homme, tant de pied que de cheual : mais il y doit auoir vn degré, ou deux (qu'on appelle banquettes) pour monter les harquebuziers, & que le parapet s'abaisse par deuant, & au front de la terrasse, afin que le Soldat estant monté sur les banquettes, puisse aysément de-

*Commandement de l'artificier.* apres appelée vn commandement : dix huit pieds, deux commandemens : trente-six pieds, quatre commandemens ; & ainsi de plus, ou moins.

La terrasse, sans comprendre le parapet, doit estre de largeur suffisante pour passer commodément chars, charrettes, Artillerie, Cauallerie & Infanterie.

Le derriere de la terrasse doit estre auallé au long, en sorte qu'on puisse facilement descendre & monter.

La hauteur des ramparts se fait à fin que tant les hommes, que les logis & maisons, soient couverts de la batterie que l'assaillant pourroit faire. Et ceste hauteur (compris le parapet) est suffisante de vingt-cinq pieds, ou environ, à prendre sur la superficie plainne de la place. Car puis que la hauteur ordinaire des logis n'est que de treize pieds, ou environ, il est bien certain que l'assaillant, en quelque lieu qu'il se puisse mettre en la campagne, & selon la portée du canon, ne pourra decouurer que la sommité des couuertures des maisons.

Et pource que l'art d'assaillir enseigne de faire & eleuer de grandes mortes & masses de terre, pour plus aysément d'icelles decouurer dans la place assiégée, & y commander : Il sera bon, tant pour empêcher les approches, que tout autre travail de l'assaillant, d'y preparer autres masses & mortes (qu'on appelle caualiers, à cause qu'ils sont plus éminents & hauts que les autres lieux, comme vn homme de cheual est par dessus vn fantassin) pour ueux qu'elles soient retirées & plus proches du centre de la place, afin qu'elles n'empêchent point les retrachemens.

La hauteur de ces caualiers sera suffisante de deux commandemens, qui sont trois toises par dessus les ramparts, & dix-huit ou vingt de quarrure, pour y loger commodément quatre canons, ou couleuvrines ; d'autant que iusques à present nous n'auons experience qu'aucun assaillant (pour puissant qu'on le puisse estimer en la Chrestienté) ayt surpassé par Art & travail, ceste hauteur, longueur & largeur : Et seroit aysé de montrer qu'une entreprise par dessus seroit peu profitable à l'assaillant.

Il reste seulement à noter en ce chapitre, que les corps tant des ramparts, que des caualiers, estans faits ordinairement de la terre qu'on tire en creusant les fossés, il semble que la proportion de l'un depend de l'autre. Et pourtant ayant posé la moindre armée garnie de douze canons, & de munitions pour tirer douze mil coups, & que les effects de tant de coups peuuent ruiner douze toises, ou environ : Nous dirons que les ramparts doiuent auoir en épaisseur, pour le moins, treize toises par le haut. Et se doit icelle épaisseur augmenter selon les places qu'on fortifiera, ayant égard aux forces des assaillans.

Ne faut obmettre de planter sur les ramparts des ormeaux, ou autres sortes d'arbres qu'on aduifera pour le mieux, tant pour le plaisir qu'on en reçoit de iour en iour, (comme chacun sçait) que pour l'utilité & profit qu'ils apportent en temps de siege, où le bois est ordinairement rare, non seulement pour le chauffage, mais aussi pour faire gabions, fascines, & autres ceures, qui seruent à la Fortification.

L'élection de ces arbres, & la façon de les planter, se laissera à la discretion de ceux qui ayment l'embellissement d'une ville, & le profit public.



## DES RETRANCHEMENS.

## CHAPITRE VII.



E retranchement qu'on a accoustumé faire en vne place assiegée, est pour arrester la violence d'un trop furieux assaut, quand par les inconueniens descriptz au chapitre troisieme, la proportion des assailliz ne répond point à celle des assaillans, ou quand, sans aucun inconuenient, la puissance des assaillans surmonte en toute sorte celle des assailliz.

Le premier est particulier, ou general.

Particulier, quand il est fait à l'endroi d'une brèche seulement.

General, quand il comprend toute la face, ou faces & parties opposées à la batterie de l'assaillant.

Le retranchement particulier se fait arriere ou ptes de la brèche, selon que la capacité du lieu le permet.

Le general, selon aucuns, doit estre éloigné du rempart, ou de la brèche, quatre-vingts, ou cent pas: Selon autres, seulement cinquante, ou soixante. Et selon d'autres aussi, vingt-cinq ou trente pas seulement.

Faut noter, que ces diuerses distances s'entendent pour les places où le dedans est libre pour le travail, & quand on n'est astreint à aucune chose. Cecy sera amplement traité au second Liure, Chapitre XI. De la forme des retranchemens.

Le plus éloigné se fait en partie à fin que les assaillans ayans gagné le haur du rempart, & forcé les assailliz de reculer, soient contrains venir de loing à decouvert: en partie aussi pour eüiter les éclats, mousquerades & harquebuzades, qui facilement perceroiern les parapets des retranchemens, lesquels, le plus souuent, ne sont que de planches, & autres choses delicates, que la necessité, ou le peu de loisir qu'on peut auoir de se retrâcher, contraint mettre en oeuvre.

Quelque fois ces distances seruēt pour combattre à cheual, quand les sorties & issues des retranchemens sont bien couuertes, & bien faites de chacun costé dudit retranchement.

L'incommodité aussi qu'apportent ces longues distances, n'est pas petite: Car les assaillans ayans fait quitter le rempart aux assailliz, peuuent ttainer, & tirer à force de bras, quelques pieces d'artillerie sur le rempart, lesquelles ils pourront facilement couurir de sacs pleins de terre, ou de gabions; & de là s'en suiura la ruine du retranchement.

Aussi les harquebuziers qui sont au retranchement, ne tirent pas assurément de si loin, & ne peuuent pas fausser ny percer si facilement les rondaches, & cuiraces, qu'en tirant de trente pas; & par consequent ne soustiennent pas si bien ceux qui defendent la brèche.

L'autre incommodité est, qu'il y a tousiours plus de besongne à faire tels retranchemens, que quand ils sont plus pres, tant parce qu'il y conuiert souuentefois abatte beaucoup de maisons & murailles, que pout ce que le circuit en est ordinairement plus grand.

Je laisse à balancer ces raisons à ceux qui sont plus expérimentez : quand à moy ie souhaiterois vn retranchement à trente ou quarante pas du rampart, ou autre distance suffisante, pour tenir seulement en ordre ceux qui seroient destinez à soustenir l'assaut : Ce qui gist au iugement d'un bon Ingenieur, & des Capitaines expérimentez.

Pour le second retranchement, est à noter, que quand la puissance de l'assaillant surpasse en forte la proportion cy-deuant alleguée, que le nombre tant d'hommes que d'artillerie, & quantité de munitions, apporte si grande ruïne, que le travail ordinaire des assaillies ne suffiroit point contre leurs efforts ; alors ie ne serois d'aduis de soustenir aucunement la brèche à coups de mains, (craignant vne trop grande meslée, qui pourroit causer quelque mal-heur ; ) ains par moyens de retranchemens extraordinaires faicts en ceste sorte.

*Retranchemens  
extraordinaires*

Sçauoir, que le rampart ayant grande & suffisante épaisseur, soit coupé & taillé à plomb du costé de la ville, pour arrester de prime face ceste grande multitude d'assaillies : & pour le surplus, construits de mesme façon que les precedens : Car il est bien vray-semblable que ces grands efforts ne tendent point à se loger sur vne brèche, pour prendre la place pied à pied, (c'est à dire avec longueur) mais la forcer par vn assaut violent, auquel on ne pourroit pas facilement resister sans ceste forme de retranchement.

*Ceste façon d'assiéger peut estre aucunement preuenüe par les Capitaines & Ingenieurs expérimentez, à cause que le bruit d'une si grande armée, & d'un tel attirail, precede de long temps les sieges, & fait penser à se munir comme il faut : autrement s'ensuit la ruïne d'une place necessairement : & ay seulement desiré ceste façon de retranchement pour ceux qui ne pouuans remedier au principal, attendent vn secours prompt.*

Les retranchemens ne doiuent iamais estre si hauts que les ramparts & terraces de deuant, afin que les batteries ne les puissent offenser.

Quand vn retranchement se faict promptement, on a quelquesfois accoustumé se seruir des ruynes des maisons, & des murailles & parois d'icelle : & à faute de ce, on entre-lace des pieces de bois de long & de trauers, avec fumier & terre ; ou on se sert simplement de pallissades bien liées & attachées ensemble, avec quelque couuerture de mantelets, planches, ou autres estoifes legeres, que la necessité contraint mettre en besongne : & a-on veu assez souuent qu'un retranchement legerement accommodé, apporte du loisir pour en faire vn plus ferme & assésuré.

Les meilleurs retranchemens sont ceux qui sont faicts de sommiers, pieces de bois, ou longues trabes entre-croisées & remplies de terre, & par dessus vne rangée de gabions bien liez & serrez ensemble, remplie aussi de bonne terre, & en defaut de gabions ; la facine fumier & terre, sont matieres pour faire vn bon parapet.

Il est aussi necessaire (si le temps le permet) de faire quelque petit fossé deuant le retranchement (pour y auoir de l'eau, s'il est possible.) Que s'il est sec, faut faire des sorties par dessous le retranchement pour entrer au fossé, & y couler des harquebuziers.

La contrescarpe de ce petit fossé doit estre vn peu haussee, afin que l'ennemy ne decouure point le pied du retranchement pour battre les poutres & sommiers, qui ne se peuent pas facilement ruiner autrement.

Les sorties des retranchemens se font selon les occurrences : mais il faut qu'elles soient bien couuertes, & non sujettes à surprise, si les assaillans venans aux mains, se mesloient avec les assaillies.





## DV FOSSE.

## CHAPITRE VIII.



Le fossé est plein d'eau, ou il est sec.

S'il est plein d'eau, il empesche les surprises, contraint l'assaillant de le remplir petit à petit, & avec grande difficulté, pour venir à l'assaut, ou bien d'y jeter quelque pont, ou ponts flottans, pour par iceux paruenir au bas de la brèche, & s'y loger pied à pied.

*Il ne parle point d'y venir à l'assaut: Car les Capitaines & Soldats experimentez scauent assez quelle fortune courent ceux qui s'y hazardent. Et s'il se trouue peu de Soldats d'assaut, (quand mesme le chemin leur seroit ferme & seur) il s'en trouue encore moins quand il faut passer par un pont branlant, ou flottant.*

Tels ponts se font donc pour gagner pied à pied, & par consequent donnent loisir aux assiegez de se retrancher, & inuenter autres artifices de defence.

Le fossé plein d'eau apporte aussi ceste incommodité, que les assaillis sont aysément renfermez, & les sorties fort dangereuses; outre que ceux qui sont jettez sur les contrescarpes & lieux forts de dehors, ne sont point si facilement secourus, & ne se peuuent pas aussi aysément retirer, à cause que les assaillans ont accoustumé de prendre garde aux portes, & les rendre (s'il est possible) inutiles à force de canonnades, ou autrement.

*Arrequer  
une place pied  
à pied, presq.  
presq. un long  
sige.*

*D'alleguer les barreaux pour secours, il me semble que cela est debile contre un assaillant aduisé.*

Le fossé sec, taillé & creusé dans la terre, doit auoir sa profondeur iusques à l'eau, ou iusques au roc, afin d'estre exempt de mines & de tranchées: & approuueray fort vn petit fossé au milieu plein d'eau (pourueu qu'elle ne se puisse oster) pour empescher les surprises: & la largeur du petit fossé me semble suffisante de douze ou quinze pieds, afin que les ponts qu'on peut faire dessus pour secourir ceux de la contrescarpe, soient plus aysés & portatils.

Le fossé sec apporte ceste commodité aux assaillis, qu'ils peuuent par diuers endroits faire des sorties, secourir facilement ceux qui sont en la contrescarpe, ou es autres logis de dehors, combattre mesme dans iceluy (quand l'ennemy l'auroit gaigné) y jeter artifices de feux, & autres choses pour bruster les fagots & facines que l'assaillant y pourroit auoir mis, vuidier les remplages, y bastir defences nouvelles, qui sont souuent perdre beaucoup de temps aux assaillans, & donnent loisir de trauailler au dedans.

On peut en vn fossé sec (qui ne sera caué iusqu'à l'eau) au pied de la muraille, &



*Cety ne se doit  
faire que lors  
qu'on attend  
vn siege.*

escarpe, faire & cauervn petit chemin en forme de canal, couuert de pierres, ou planches, de deux pieds, ou enuiron de largeur, & de quatre de hauteur; pour par iceluy pou-  
uoir subtilemēt mettre de la poudre, & autres artifices, au pied & au-dessous de la brèche, afin qu'à l'instant de l'assaut, la poudre estant allumée, emporte par son exhalation les ruynes de la brèche, qui seront dessus: Ce qui ne se fera sans perte, & terreur des ennemis, faisant par ce rauage la brèche plus inaccessible qu'elle n'estoit. Finalement, en vn fossé fee se peuuent plus commodément & promptement faire des logis pour defendre le long d'igelay, qu'en vn fossé plein d'eau.

Quand à la largeur des fossez, les extremitéz sont desaduantageuses: car la trop grande largeur est cause que l'assaillant découure facilement le pied de la muraille de l'escarpe; & la trop petite, est aysément remplie, & est cause que plus facilement on oyt ce qui se fait dans la place.

*La premiere  
proportion du  
fossé procede de  
la premiere pro-  
portion du  
rampart.*

Mais d'autant que le corps des ramparts se fait de la terre qu'on tire des fossez, & que tel corps (ainsi qu'il a esté décrit au Chapitre des Terraces) estant reduict sous deux lignes droictes seulement, pouroit contenir pour la moindre épaisseur treize toizes de largeur, & trois ou quatre de hauteur: Il s'ensuit que nous deuons, pour le moins, donner la mesme proportion au fossé; sçauoir treize toizes par le fond de largeur, & trois ou quatre de profondeur: avec ceste consideration neantmoins de les augmenter, selon la capacité des places qui se fortifieront, ayant égard à la puissance de l'armée assaillante, comme il a esté dict.

Ce n'est pas que si le lieu n'est couuert de beaucoup de terre, & quel'eau se trouue trop tolt, qu'on ne puisse élargir le fossé, & y en prendre ce qu'il faudra pour faire le corps du rampart de son épaisseur & hauteur: Et si le roc se trouue aussi, lors faudra chercher des terres ailleurs, & creuser & élargir le fossé comme on pourra.

Et pource que le circuit des fossez est plus grand que celuy des ramparts, & qu'il y auroit plus à vuidier qu'à remplir, il est bon d'employer ce surplus à faire les cavaliers, ainsi que nous auons dict, & à releuer quelque peu la contrescarpe, comme il sera monstré au chapitre suivant.

Tellement que ce qui sera par dessus ceste proportion, fera peu de profit, & ne se rapportera aucunement à la maxime descrite sur la fin du troisiésme Chapitre de ce Liure.

*Cela soit dict pour les places de terre ferme.*

Pour le regard des fossez pleins d'eau, ie croy que deux de quarante-cinq pieds chacun, séparé d'une petite terrasse de dix pieds, ou enuiron d'épaisseur, valent mieux qu'un de cent: Parce que jettant vn pont flottant, il s'arrestera à ceste terrasse, laquelle se fera disputer, si elle est bien faite, pour couvrir seulement quelques Soldats: Et en vn fossé large, vn pont fera quasi aussi tolt jetté comme en vn estroit.



# DE LA CONTRESCARPE ET

## CHEMIN COUVERT, APPELLE

### COVRIDOR.

#### CHAPITRE IX.



A contrescarpe est de roc, ou de mutaille simplement.

Si elle est de roc, elle a cela d'avantage, que l'assaillant ne la peut facilement percer pour voir ou entrer dans le fossé : Le contraint ou de le remplir, ou de faire avec grand travail vne entrée en iceluy.

On peut en la demy hauteur d'icelle faire logis de defense, & y loger quelques harquebuziers, pour tirer au dos ceux qui donneront à la muraille ou à la brèche, & par ce moyen rompre vn assaut, & donner du temps aux assiegez.

Si la contrescarpe est de muraille, elle empêchera que de prime face on ne gaigne le fossé & le pied del'escarpe, & contraindra l'ennemy de la percer, ou remplir le fossé (comme dict est,) mais aussi l'ennemy assaillant s'en peut servir de couverture contre ceux de dedans, en sorte qu'il verra à son gré rout le fossé, & ne sera point veu.

Les contrescarpes de terre doivent estre reuestues de mutailles épesses, & basties de bonnes & dures matiere, (comme celle, que nous auons alleguées) si faire se peut, pour éviter les incommoditez décrites au Chapitre de la muraille & de sa matiere.

Le couridor se doit faire de quatre ou cinq toises de largeur, pour aller & venir Cautellerie & Infanterie; & de hauteur pour couvrir vn homme de cheual: y ayant toutesfois des banquettes & degrés pour élever les gens de pied, afin de tirer par-dessus.

Les hauteurs des contrescarpes doivent estre moindres que celles des tampsarts, & celles cy (c'est à dire du rimpart) moindres que celles des Cavaliers, afin que ce qui est plus éloigné du centre de la place, soit tousiours commandé de ce qui en est plus près.

Les hauteurs des contrescarpes & couridors neantmoins se font selon le temps & le lieu. Selon le temps, comme quand on craint vn siege prompt & violent, & lors les couuient hausser en sorte que les deux tiers, ou enuiron, de la muraille soient couuers de la batterie de l'ennemy, & que ce qui sera battu ne soit suffisant pour remplir le fossé, ou bailler ouuerture à la place par vne brèche raisonnable. Le rout neantmoins selon la consideration du travail & du profit qu'on en peut esperer, comme il a esté dict sur la fin du troisième Chapirre de ce Liure.


Selon le lieu, comme quand la contrescarpe est de roc: alors ie n'y souhaitteroïs autre chose sinon le couridor raillé en icelle, afin que l'assaillant ne se peult couvrir & ayder de la terre qu'autrement on y mettroit, & qui y seruirois beaucoup pour y élever vn Cavalier.

Et pour ceste mesme raison, ie ne serois point d'avis qu'aux places marescageuses on y fist autre contrescarpe, ny plus haute, que pour couvrir les harquebuziers seulement, pourueu encore qu'il y eust des chemins & ponts bien assurez pour le retirer.

Pour le regard des contrescarpes de roc, ou de muraille, ie serois d'avis qu'en certains endroits elles fussent talluées & faictes en glacis aisé pour se couler dans le fossé, & difficiles pour remonter, tant pour donner retraicte assurée à ceux qui gardent le dehors, que pour faciliter l'entrée à vn secours, qui autrement pourroit estre défait sur le bord du fossé.

Finalement, il se peut faire vn petit fossé de dix ou douze pieds de large, deuant le couridor, pour empêcher l'ennemy de recognoistre le grand fossé, & tenir durant la nuit en

Palissade de camp.



Pièce de formure de camp.



feurenté les Soldats qui gardent la contrescarpe: pourueu que ce fossé soit deuëment & d'assez prés defendu du corps de la forteresse. Autrement conuiendrait seulement faire vne seconde & double contrescarpe, & icelle garder par le moyen de quelques pallissades qui se pourroient ranger en lignes paralleles de la mesme seconde contrescarpe, distantes d'icelle (en tirant vers le fossé) enuiron huit ou dix pieds, & couuertes du costé de l'ennemy par la hauteur d'icelle: Car alors ces pallissades ne pouuans estre facilement battues, empêcheroient à tout coup l'assaillant de venir aux mains avec les assailis gardans le dehors, qui est vne des principales choses que tous les assailis doiuent eüiter.

Les pieces inuentées par feu Messire Robert de la Marck, qu'on appelle pieces de fermeture de camp, sont fort propres à telles choses: car outre qu'elles sont portatiues, elles donnent aussi ceste inécomodité à l'assaillant, que de quelque façon qu'on les puisse tourner, elles sont tousiours offensiuës par leurs pointes de fer, ou acier, dequoy vn chacun baston est garny par les deux bouts, comme la figure le demostre; & outre sont aysées & faciles à démonter, pour estre transportées és lieux plus dangereux, selonque la nécessité le requiert. Telles choses se pourront voir és Villes & Chateau de Sedan & Iamers, où elles ont esté souuent pratiquées, comme aussi en Hollande, & autres endroits.

Il y a encore vne autre façon de pallissades, ou pieces de camp, qui ne sont offensiuës que d'vn costé, mais se peuuent haüßer & abaïsser à discretion: C'est pour quoy ie les trouue plus propres à cét effect que les autres, à cause que de iour on en peut oster la veüe aux ennemis, & la nuit se peuuent en vn instant haüßer pour seruir promptement d'vn obstacle & empeschement aux assailis contre les assailans, afin de ne venir aux mains sur la premiere contrescarpe. Et si de iour il se faisoit quelque effort, ceux qui sont en icelle premiere peuuent par le moyen de cordages, haüßer & abaïsser lesdites pieces, ainsi que la figure le monstre plus amplement.



## DE L'ART D'ASSAILLIR

### CHAPITRE X.



**L** sera bon de descrire sommairement les maximes principales de l'Art d'assaillir, afin que cy-apres au traité de la Fortification des places, on ne mette en doute ce qui aura vne fois esté accordé, & que les conclusions en soient tirées nécessairement.

Soit donc pour la premiere, tenu pour constant, quand le front des assailans est égal, ou plus grand que celui des defendans, que ceux-cy doiuent estre emportez & vaincus de ceux-là.

Qu'en vne brèche faicte en vn angle & extremité de place, l'entrée est égale en estendue, ou plus grande pour les assailans, que pour les assailis, à cause que ce qui enferme est plus grand que ce qui est enfermé.

Qu'une brèche faite au milieu d'une ligne droite, est plus difficile à forcer, que sur un angle, à cause que la forme ne pouvant estre que courbe, rend plus d'estenduë aux assaillais, qui en tiennent l'arc, qu'aux assaillans qui n'en ont que la corde.

Qu'en un angle retiré la brèche est plus difficile à forcer, qu'en un angle saillant, ou au milieu d'une ligne droite, pour les mêmes raisons.

Que les tranchées des assaillans ne doivent commencer plus près de la place, que de la portée de l'arquebuzer, ou du mousquet exclusivement, à cause de l'offension continuelle de l'arquebuzerie, plus dommageable que l'artillerie, laquelle ne se meine point si facilement.

Que les tranchées doivent estre conduites en sorte, que de quelque endroit que ce soit de la place assiégée, on ne puisse tirer dedans de long, pour les enfler par aucun coup de trait.

Que les tranchées sont plus aisément conduites, & en moins de temps, vers les extremitez de la place, qu'au milieu d'une ligne droite, ou dans un angle retiré, à cause que vers les extremitez elles se peuvent tirer & mener droictes au lieu désiré, sans estre veües ny endommagées de long; ce qui ne se peut faire aux autres lieux sans plusieurs tours & détours.

*Et est à noter qu'il vaut mieux ne faire qu'un peu de tranchées qui soient bien larges & bien uyées pour les entrées & sorties, que de beaucoup trancher & labourer la terre, craignans que la superfluité n'apporte de la confusion; principalement sur le point d'une sortie, où on ne se peut pas aisément recognoistre, estans separés en plusieurs & diuers lieux. Les guerres passées nous ont fait assez cognoistre quelle longueur & peril ce vain travail apporte.*

Qu'une grande partie de l'Artillerie des assaillans doit estre placée en mesme temps qu'on commence les tranchées d'approche; en sorte qu'elle puisse démonter les pieces de dedans, ruiner, ou du moins incommoder les lieux plus éminents & aduantageux de la place, pour fauoriser les approches.

Que le lieu où sera placée ceste premiere Artillerie, doit estre par Nature, ou par Art, aucunement élevé; afin que les batteries n'incommodent les tranchées d'approche qui seront au-deuant.

Que les entrées qu'on fera pour gaigner le fossé, doivent répondre aux extremitez des angles du corps de la place, & non aux extremitez du fossé; principalement es places qui sont faites en angles saillans & rentrans (qui seront dictes cy-apres, Tenailles:) Car en ceste premiere sorte d'entrée, l'angle n'estans capable pour y loger l'Artillerie, & estant comme inutile & abandonné, à cause de l'épaisseur de la muraille, parapet, ou rampart, il sert de couuerture à l'entrée que l'assaillant fait au fossé, comme E D: Et en la seconde sorte, les entrées (comme entre M N) peuvent estre veües d'un costé, & embouchées de l'autre: mais de loing (comme de  $\omega \phi$ , qui est une offension combien que peu assurée) plus difficile neantmoins à empêcher que de bien près: parce que les assaillais ayans assez d'espace pour placer leur Artillerie, se sentans aucunement esloigner des batteries, peuvent hazardeusement entreprendre de tirer quelques coups, qui ne sont pas peu d'exécution, dans une tranchée ou trauerse au fond d'un fossé, couuerte de planches, mantelets, clayes & autres choses propres, seulement pour se defendre des artifices jettés d'en-haut. Et quand mesme de cinquante coups, un seul adresseroit directement, (ou par bricoles, si le lieu le donnoit) il feroit plus de ruïne & ravage qu'on n'en pourroit reestablisher en un iour, comme scauent assez ceux qui sont employez en telles charges.

Je ne parleray point de la defense des tranchées, ny des corps de garde necessaires, d'autant que cela fait peu à nostre propos, & appartient à l'Art de Fortification, qui est décrit cy apres.

Toutes lesquelles maximes neantmoins se doivent entendre, si l'impuissance tant de la place

*Ces s'entend de ceste partie seulement, qui est occupée à l'extremité par l'épaisseur tant de la muraille, que du rampart, & non de tout l'espace que les lignes qui font l'angle prennent compréhens.*

la place que des assiegez, ou la trop grande force & puissance des assaillans ne conuie de faire autrement, pour gagner le temps, ou quelque autre aduantage. Comme pour exemple, quand les assaillans, apres auoir commiené leurs approches, veulent promptement empêcher les sorties aux assiegez, (principalement aux places qui ont les fossés secs) & que l'obseruation deuant dicté apporteroit beaucoup de longueur, ou quelque peril : Alors, si l'Artillerie est disposée en sorte qu'elle ruyne le lieu à l'endroit duquel on veut aborder, ou le rendre inutile, tellement que les assiegez ne s'y puissent presenter, ny moins y placer quelques pieces; Il sera bon tirer promptement la tranchée vers le lieu ruyné, pour gagner la contrescarpe, & commander dans le fossé, soit sec, ou plein d'eau, & qu'avec loisir & seureté on puisse trauailler aux autres tranchées & batteries necessaires,





*Transects.*

pourueu neantmoins que le front de la tranchée soit tellement haussé & couuert, que les assaillis ne puissent par hazard decouurir & tirer le long d'icelle: Car en ce cas seroit besoin de plusieurs tranchees, comme la figure le monstre: en laquelle les barteries X, Y, Z, sont placées, en sorte qu'elles tuyenent le lieu L, à l'endroi& duquel on desire approcher, & y conduite la tranchée B: Tellement qu'au lieu de continuer la longueur des tranchees B C, & C D, il ne sera besoin de passer E, d'où sera menée la tranchée de front E D.

Pareillement s'il y a quelque endroi& de la place assiegée, qui soit plus bas que l'assiette des tranchees, & qui se puisse promptement hausset & separer, ou que la meisme assiette soit plus basse que la place, comme en pente, lors il n'y aura point d'inconuenient d'y mener vne ou plusieurs tranchees de front, iusques sur la contrescarpe, (s'il est necessaire) comme il est remarqué en P F, O S: & n'importera pas beaucoup à vn assaillant accord, s'il est veu du sommet des maisons, ou d'un lieu qui ne se peut promptement remparer, à cause que l'offense qui en vient ne peut estre que de l'arquebuzes ou mousquet, contre lesquels il est facile de se couurir, tant avec mantelets, qu'avec autres instrumens portatifs, qui se font pour cét effect.

Ce dernier discours soit fait pour la defence de ceux qui par mauuaises assiettes & incommoditez des lieux, ou autres accidents, sont contraincts à toute occasion inuenter & faire choses qui semblent estre contre les preceptes de l'Art.



## DES QUALITEZ REQVISES A VN INGENIEVR, QVI VEVT FORTIFIER ET DEFENDRE VNE PLACE.

### CHAPITRE XI.



*Intention du  
Prince qui veut  
fortifier une  
place.*

**D**'AVTANT que de la sùffsance & iugement de l'Ingenieur, dépend tout le dessein de la forteresse, & que les Roys, Princes & grands Seigneurs, doivent bien & exactement examiner les raisons, pour lesquelles est faite la fortification de ceste sorte, ou de l'autre; Il est bien necessaire aussi que l'Ingenieur sçache desseigner, pourtraire, & bien leuer exactement vn plan, afin que sur iceluy il discoure à propos de toutes les parties de la Science, en sorte qu'il puisse par demonsttrations Geometriques (& non mechauiques, à la façon des ignorants) faire cognoistre ce qu'il aura conceu pour l'accomplissement de son dessein, lequel se doit tousiours rapporter à l'intention du Prince, qui veut fortifier selon ses moyens, selon le temps, & selon la puissance & force de son ennemy; comme il a esté dit en la maxime sur la fin du troisieme chapitre.

Et pourtant, il est premierement de besoin qu'il cognoisse sùffisamment la force de



l'Artillerie, tant selon le nombre des pieces & disposition des batteries, que selon le calibre & valeur de la poudre; afin qu'il se puisse ayder de ceste cognoissance, tant en la construction de la place, qu'en la defense d'icelle, & s'opposer à ce foudre par les moyens qu'il cherchera.

Qu'il soit Soldat, ayant veu sieges tant offensifs que defensifs; c'est à dire, qu'il ayt esté deuant plusieurs villes assiegées, afin qu'il sçache faite les retranchemens necessaires au logement d'une armée, disposer & placer les batteries, tracer, fort & redouté, & conduire les tranchées d'approche; & dedans plusieurs autres, estât assiegez, pour sçavoir que c'est de la force & de la vigilance d'un homme en une place assiegee, esquelles consiste une partie de la defense d'icelle.

Qu'il sçache aucunement commander avec discretion des personnes, afin que mal à propos il ne face point faire à l'un ce qui est propre à l'autre, & qu'il évite toute sorte de confusion, lors qu'il sera besoin verser de son Art, en la defense de la place.

Qu'il soit cogneu des Soldats afin d'avoir creance parmy eux, & d'estre mieux servy au travail qu'il aura à faire.

Qu'il soit Geometre, tant pour inventer machines, qu'autres instruments servans à la defense de la place, & au travail necessaire, que pour demonstrier l'utilité & profit de ses inventions, avant que les mettre en pratique, & proportionner l'ouvrage à faire, au temps & aux moyens presens, & par ainsi éviter les despenses excessives, qui se font le plus souvent mal à propos, faute d'entendre ceste belle Science de Geometrie. Sur tout, lors qu'il sera assiege, qu'il pense & cherche les moyens de soulager ceux qui travaillent: car il n'y a chose plus insupportable que le sommeil provenant du trop grand travail (comme l'experience l'a assez fait cognoistre.) Et pour ce faire, qu'il adivise outre l'ordre qu'il peut mettre entre les travaillans, à faire servir les choses qui semblent estre inutiles, & les approprier chacune selon le temps & lieu convenable, comme chevaux, bœufs & ânes, qui sont le plus souvent sans faire aucun service.

*Sommeil provenant de trop grand travail, est insupportable.*

Qu'il cognoisse quelque chose de l'Architecture commune, & de la maçonnerie; afin qu'il puisse asseurer les fondemens d'une fortification, & adviser aux materiaux propres pour la construction, selon les hauteurs, épaisseurs & talus convenables.

L'advertissant neantmoins, qu'il est bon de hanter les Grands, afin que cognoissant combien la multitude de tant & divers affaires les rend impatient d'entendre ce que le plus souvent leur est tres-necessaire de cognoistre pour leur propre service, il s'estudie à discourir brièvement & intelligiblement: mesme qu'il ait employé quelque temps auparavant à monstrier les plus beaux traits de la Science à son Seigneur & maitre: afin de luy en donner du contentement, quand il sera temps, & qu'il le trouve mieux préparé à entendre ses raisons.

Qu'il ne consente iamais à un mauvais dessein, car l'honneur qui en peut provenir, n'est point grand, & le deshonneur est un monstre.

Qu'il s'estudie plustost à enseigner que contester contre un ignorant: car il est à craindre à un homme ayant de la Science, de rencontrer un ignorant qui a du crédit, pour plusieurs raisons que chacun sçait.



# COMMENT SE DOIVENT LEVER

LES PLANS DES PLACES, POVR ESTRE  
RAPPORTEZ ET REDVICTS AV  
PETIT PIED.

## CHAPITRE XII.

*L'angle exte-  
rieur est celui  
qui se mesure  
par dehors, &  
l'intérieur par  
dedans.*



N ne peut pas bien ny facilement discourir des places à for-  
tifier, que premièrement leurs Angles, tant extérieurs que inte-  
rieurs, ne soient cognus, & le plan d'icelles reduits au petit pied.  
Cecy se pourroit traiter au troisiéme Liure, qui est fait pour  
les places irregulieres; Mais d'autant qu'il est icy question des  
qualitez requises à vn Ingenieur, j'ay pensé qu'il seroit plus à  
propos en cét endroict de l'informer de ce qui luy est neces-  
saire pour venir à l'effect de sa science.

Il doit donc faire provision de bons instruments, & bien  
iustes, soit selon l'invention d'autrui, ou selon la sienne, afin d'operer facilement, & venir  
à bout de son dessein. Je mets cestuy en auant, qui me semble tres-facile à cét effect, sans  
neantmoins vouloir astringre aucun à ceste seule forme.

Soit préparé vn demy cercle, de grandeur conuenable, & de matiere dure & solide, pour  
y graver les diuisions & marques égales, qui seront en nombre de cent quatre-vingts,  
(nommées degrez par les Astronomes) & que les chiffres soient aussi marquez commen-  
çant de droicte à gauche, & apres au rebours de gauche à droicte (afin de distinguer les  
angles extérieurs d'avec les intérieurs.) Le diametre ou la corde de cét instrument soit ce  
qui est cotté pour baze, à chacun bout de laquelle sera vne Pinule. Apres soit vne lidade  
tournant sur le centre dudit demy cercle, ayant aussi à chacun bout vne Pinule; & soit  
cette lidade faite en sorte que monstrant le degre sur lequel elle sera arrestée, elle puisse  
aussi enseigner le nombre des degrez que l'angle cerché comprendra, estant le Cercle seul  
mesureur de tous angles. Finalement soit au milieu de l'instrument vn Bussolle avec son  
Aiguille bien aymentée, pour par icelle trouuer les lignes paralleles que la seule veüe ne  
peut discerner: à l'enrou duquel Bussolle seront tracez trois cents soixante degrez, qui  
seruiront à la cognoissance des angles de notez par icelle Aiguille.

*Le Cercle seul  
mesureur des  
Angles.*


La pratique de cét instrument est telle.

Soit vne place proposée comme  $\Sigma$ , de laquelle faut leuer le plan, & le reduire au  
petit pied; selon la mesure proposée N  $\Delta$ .

Premierement faut appliquer la baze de l'instrument selon la ligne A B, comme E D,  
& en sorte que le centre de l'instrument soit à l'angle A: apres faut mouuoir la lidade, en  
sorte qu'elle soit selon la ligne A G, comme C F: Ce fait faut compter les degrez du  
demy

demie cercle entre C & E, car l'angle cerché contiendra autant de degrez, estant l'angle C A E égal à l'angle D A F. Ainsi donc cet angle estant rapporté au point *a* du petit dessein  $\phi$ , ne restera sinon d'avoir l'estendue des costez A B, A G, lesquels posez estre, sçavoir A B de cent quatre-vingts toizes, & A G de deux cents vingt-cinq toizes, il fera facile d'estendre la ligne *a* jusques a cent quatre-vingts mesures de celles dont N  $\Delta$  en contient cinq cents, & l'autre *a b* à deux cents vingt-cinq des mesmes mesures. Cecy est general & universel pour tous autres angles interieurs.

Si vn autre angle exterieur, comme A G, doit estre rapporté au mesme petit pied, soit la baze K L mise au long, & selon la ligne A G, & la lidade I G tendante au point H, il est certain que l'angle A G H comprendra autant de degrez qu'on en trouvera entre I & L: Tellement que s'il est mis (avec la railon des costez qui comprennent ledit angle) au point *b*, il fera le triangle *a b c* équiangle & proportionnel au grand A G H,



par la proposition cinquième du sixième d'Euclide. Que si la rotondité entre G & M empêche de bien & exactement prendre ledit angle, faut reduire (si le lieu le permet) le circuit en lignes droictes, comme A H R N V : Ainsi l'angle A H N, estant avec la raison de ses costez mis au point c, on trouuera les angles  $a c b$ , &  $b c d$ , estre égaux aux angles A H G, & G H N. Et par ainsi, si la distance entre G & M est cogneuë, il sera facile de la reduire au petit pied entre  $b$  &  $d$ , & par conséquent la rotondité entre ces deux poinçts.

Dauantage, s'il faut proceder à la recherche des angles des poinçts v y &  $\beta$ , & que commodément on puisse trauerser la ligne v  $\beta$ , il est euident que la rapportant au petit pied, comme e f, avec la raison de sa longueur, on trouuera facilement vn angle égal à Y.

Pour le regard de la circonference caue  $\beta \theta \lambda$ , la mesme facilité se trouuera pour la rapporter au petit pied, en imaginant la ligne droicte  $\beta \lambda$  : car l'angle v  $\beta \lambda$ , se pourra rapporter au point f, & la circonference caue entre f & g, avec la raison de sa perpendiculaire.

Finalement, il se trouue quelquesfois plusieurs angles, tant extérieurs, qu'intérieurs, qui seroient par trop penibles d'estre rapportez en petit, les vns apres les autres; & pour-tant soit la ligne  $\lambda 1$ , continuée iusques au point 3, en sorte que de ce point on puisse decouuoir au long d'une mesme ligne les angles 10, & B, & rapportez avec la raison des costez au point h. Il est euident qu'entre  $h$  &  $i$ , se trouueront les angles tant extérieurs, qu'intérieurs, égaux aux precedents les vns aux autres. Que s'il se trouue quelque difficulté de rapporter ainsi les angles, par le moyen de la baze de l'instrument, & de la lidade, il faudra auoir recours au recipiangle icy tracé, lequel apliqué au centre, aura l'un de ses costez sur la ligne de la baze, & l'autre au degré remarqué, pour apres estre transposé en la superficie plane, sur laquelle se fera le dessëing au petit pied.

Je n'ay icy fait mention du Bussolle, parce que l'incertitude du mouuement de l'aiguille fait le plus souuent tomber en grands erreurs: il est seulement reserué pour la necessité, quand les raiz de la veuë sont empeschées par quelque obstacle qui ne se peut oster. Cely sera donc remis au iugement des bons esprits.

Il y a encore plusieurs autres sortes de leuer les plans, & les rapporter au petit pied; mais il me suffit d'auoir monstré celle-cy, afin de ne rien obmettre de ce qui est necessaire à vn Ingenieur, qui par le long & continuel exercice de ceste pratique, y pourra adjoûster ou diminuer, selon qu'il jugera estre expedient.

FIN DV PREMIER LIVRE